

Službene novine Kantona Sarajevo, broj 17/25

Na osnovu člana 26. i 28. stav (1) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka) i člana 10. stav (2), 26. stav (1) tačka a) i 49. stav (2) Zakona o državnoj službi u Kantonu Sarajevo ("Službene novine Kantona Sarajevo", broj 31/16, 45/19 i 6/25), Vlada Kantona Sarajevo, na 113. vanrednoj sjednici održanoj 18.04.2025. godine, donijela je

UREDBU

O IZMJENAMA I DOPUNAMA UREDBE O POSLOVIMA OSNOVNE DJELATNOSTI IZ NADLEŽNOSTI ORGANA DRŽAVNE SLUŽBE U KANTONU SARAJEVO KOJE OBAVLJAJU DRŽAVNI SLUŽBENICI, USLOVIMA ZA VRŠENJE TIH POSLOVA I OSTVARIVANJU ODREĐENIH PRAVA IZ RADNOG ODNOSA

Član 1. (Izmjena člana 8.)

U Uredbi o poslovima osnovne djelatnosti iz nadležnosti organa državne službe u Kantonu Sarajevo koje obavljaju državni službenici, uslovima za vršenje tih poslova i ostvarivanju određenih prava iz radnog odnosa ("Službene novine Kantona Sarajevo", broj 39/16 i 10/17), član 8. mijenja se i glasi:

"Član 8. (Studijsko-analitički poslovi)

(1) Studijsko-analitički poslovi obuhvataju naročito:

- a) poslove interne revizije u skladu sa važećim propisima iz oblasti interne revizije u javnom sektoru;
- b) izradu analiza, izvještaja, informacija i drugih stručnih i analitičkih materijala na osnovu odgovarajućih podataka;
- c) izradu prednacrtu, nacrtu i prijedloga budžeta i završnog računa (opći bilans sredstava);
- d) izradu elaborata, studija, programa, projekata, planova i procjena u određenoj oblasti, kao i projektnih zadataka za odgovarajuću oblast;
- e) izradu metodologija (klasifikacija, nomenklatura i sl.) za odgovarajuću oblast;
- f) pripremanje programa istraživanja u pojedinoj oblasti i predlaganje metodoloških rješenja, kao i rad na tim programima;

- g) stručnu obradu sistemskih rješenja od značaja za odgovarajuću oblast i
- h) izradu analitičkih, informativnih i drugih materijala u okviru propisane metodologije (tipski izvještaji, redovne ili periodične informacije i sl.).

(2) Poslovi iz stava (1) ovog člana, po složenosti se razvrstavaju prema sljedećem, i to:

- a) poslovi iz stava (1) tačka a) ovog člana, su najsloženiji i vrše ih državni službenici - interni revizori,
- b) poslovi iz stava (1) tačka b) do d) ovog člana, su najsloženiji i vrše ih državni službenici - stručni savjetnici,
- c) poslovi iz stava (1) tačka e) i f) ovog člana, su složeniji i vrše ih državni službenici - viši stručni saradnici,
- d) poslovi iz stava (1) tačka g) i h) ovog člana, su složeni i vrše ih državni službenici - stručni saradnici."

Član 2.

(Novi član 16a.)

Iza člana 16. dodaje se novi član 16a. koji glasi:

"Član 16a.

(Rukovodilac jedinice za internu reviziju)

(1) Rukovodilac jedinice za internu reviziju, ovlaštenja iz svoje nadležnosti utvrđena u članu 13a. Zakona o državnoj službi, vrši na način što neposredno rukovodi jedinicom za internu reviziju i u tom pogledu organizira vršenje svih poslova iz nadležnosti te jedinice u skladu sa propisima iz oblasti interne revizije u javnom sektoru i neposredno izvršava obaveze za koje je ovlašten u skladu sa propisima iz oblasti interne revizije u javnom sektoru.

(2) Prilikom obavljanja interne revizije rukovodilac jedinice za internu reviziju ostvaruje saradnju sa Centralnom harmonizacijskom jedinicom Federalnog ministarstva finansija kao i Uredom za reviziju institucija u Federaciji Bosne i Hercegovine u razmjeni izvještaja, dokumentacije i mišljenja.

(3) Rukovodilac jedinice za internu reviziju, za vršenje poslova iz st. (1) i (2) ovog člana, odgovoran je organu koji ga je postavio na radno mjesto rukovodioca jedinice za internu reviziju."

Član 3.

(Izmjene i dopuna člana 27.)

(1) U članu 27. stav (1) mijenja se i glasi:

"(1) Na radna mjesta državnih službenika iz člana 14. do 18. ove uredbe, mogu biti postavljeni državni službenici koji imaju završenu odgovarajuću visoku stručnu spremu, položen stručni ispit i radni staž u struci, i to:

- a) na radno mjesto rukovodioca stručne službe iz člana 14. ove uredbe - najmanje sedam godina radnog staža,
- b) na radno mjesto sekretara organa državne službe iz člana 15. ove uredbe - najmanje šest godina radnog staža,
- c) na radno mjesto pomoćnika rukovodioca organa državne službe, rukovodioca jedinice za internu reviziju i glavnog inspektora, iz člana 16., 16a. i 17. ove uredbe - najmanje pet godina radnog staža,
- d) na radno mjesto šefa unutrašnje organizacione jedinice, iz člana 18. ove uredbe - najmanje četiri godine radnog staža."

(2) U stavu (2) tačka b) iza riječi: "radni staž", dodaju se riječi: "u struci,".

(3) U stavu (3) riječi: "iz člana 45. Zakona o državnoj službi" zamjenjuju se riječima: "kao i vrijeme stručnog osposobljavanja bez zasnivanja radnog odnosa".

(4) Stav (5) se briše.

Član 4. (Izmjena i dopuna člana 30.)

(1) U članu 30. iza stava (1) dodaje se novi stav (2) koji glasi:

"(2) Vrsta visoke stručne spreme iz stava (1) ovog člana određuje se za svako radno mjesto prema opisu poslova radnog mjesta, uz koju se konkretno određuje i stepen stručne spreme, odnosno, ciklus Bolonjskog sistema studiranja sa ostvarenim ECTS bodovima, s tim da su stečene diplome prvog i drugog ili trećeg ciklusa Bolonjskog sistema studiranja iste struke."

(2) Dosadašnji st. (2) i (3) postaju st. (3) i (4).

Član 5. (Obaveza usklađivanja pravilnika o unutrašnjoj organizaciji)

Rukovodilac organa državne službe, gradonačelnik i općinski načelnik dužni su uskladiti pravilnike o unutrašnjoj organizaciji sa odredbama ove uredbe u roku od 90 dana od dana njenog donošenja.

Član 6. (Stupanje na snagu)

Ova uredba stupa na snagu narednog dana od dana objavljivanja u "Službenim novinama Kantona Sarajevo".

Broj 02-04-12838-1/25
18. aprila 2025. godine
Sarajevo

Po ovlaštenju premijera
Ministar
Omer Osmanović, s. r.